

UGOVOR o nabavci usluga

zaključen između:

Fakultet za kriminalistiku, kriminologiju i sigurnosne studije Sarajevo

Zmaja od Bosne 8, 71 000 Sarajevo

koje zastupa dekan prof.dr Jasmin Ahić

Identifikacioni broj: 4200597880000

(u daljem tekstu: Naručilac)

i

BH Telecom d.d. Sarajevo

Franca Lehara 7, 71000 Sarajevo

v.d. direktor BH Telecom – Direkcija Sarajevo, Faruk Selmanović

Identifikacioni broj: 42002111000005

Transakcijski broj: 161-0000078020118,

Raiffeisen Bank d.d. BiH

(u daljem tekstu: Izvršilac),

PREDMET UGOVORA

Član 1.

Predmet ovog Ugovora je nabavka usluga i to *Telekomunikacijske usluge/Usluge fiksne telefonije*, koju će Izvršilac/Dobavljač izvršavati za Naručioca/Kupca u skladu sa odredbama ovog Ugovora i sljedećim dokumentima koji čine sastavni dio ovog ugovora u obliku njegovih priloga i to:

• Ponudom/specifikacijom Izvršioca br. 116851/20-01 od 28.12.2020., - dalje:

Ponuda Izvršioca/Dobavljača - (Prilog 1), (ugovorne strane podrazumijevaju da kompletna Ponuda Izvršioca/Dobavljača koja je dostavljena po predmetnoj nabavci sa svim dostavljenim dokumentima/aktima/dokazima/nacrtima/specifikacijama i dr. čini sastavni dio ugovora s tim da se zbog obimnosti iste uz ugovor fizički vežu samo dokumenti iz ponude koji se odnose na osnovne komercijalne i tehničke elemente ugovora/nabavke), dostavljena po Konkurentskom postupku, Telekomunikacijske usluge – Usluge fiksne telefonije.

CIJENA

Član 2.

Ukupna cijena koju će Naručilac/Kupac isplaćivati za ukupno 12 (dvanaest) mjeseci, a po mjesečnoj fakturi za predmetnu uslugu Izvršiocu/Dobavljaču za usluge iz člana 1. Ugovora iznosi:

- Cijena bez PDV-a: **5.257,56 KM;**
- Porez na dodanu vrijednost (PDV 17 %): 893,79 KM;
- Ukupna cijena sa uračunatim PDV-om: **6.151,35 KM,**

(slovima: šestthiljadajednastotinapedesetjedan i 35 /100 KM).

USLOVI I NAČIN PLAĆANJA

Član 3.

Plaćanje će se izvršiti u roku do šezdeset (60) dana od dana zaprimanja računa za stvarno izvršene usluge. Plaćanje se obavlja na transakcijski račun Izvršioca/Dobavljača. Naručilac/Kupac ne prihvata avansno plaćanje i traženje sredstava osiguranja plaćanja. Ukupna plaćanja Izvršiocu bez PDV-a na temelju sklopljenog ugovora ne smiju prelaziti procijenjenu vrijednost nabavke.

Obaveza Naručioca/Kupca da isplati cijenu podrazumijeva poduzimanje mjera i udovoljavanje formalnostima predviđenim Ugovorom ili odgovarajućim zakonima i propisima da bi se omogućilo plaćanje.

Izvršilac/Dobavljač je dužan izdati/sačiniti fakturu u skladu sa odredbama pozitivnih propisa iz oblasti poreza, u suprotnom ista neće biti plaćena i biće vraćena Izvršiocu/Dobavljaču na usklađivanje.

Uslovi plaćanja i drugi uslovi koje Izvršilac/Dobavljač jednostrano unese u fakturu ne obavezuju Naručioca/Kupca ni onda kada je fakturu primio, a nije joj prigovorio.

OBAVEZE IZVRŠIOCA

Član 4.

Izvršilac se obavezuje

- da će usluge koje su predmet Ugovora vršiti u skladu sa zahtjevima iz tenderske dokumentacije i karakteristikama iz ponude koji su u prilogu i sastavni su dio ovog Ugovora;
- kvalitetno i uredno izvršava Ugovor u skladu sa nalogima Naručioca/Kupca, važećim propisima, pravilima i standardima struke za ovu vrstu posla, štiti prava i interese Naručioca;
- riješi eventualne reklamacije Naručioca/Kupca potpisane od strane ovlaštenog predstavnika Naručioca/Kupca, i ispostavi fakturu za isporučene usluge.
- da će otkloniti sve nedostatke odmah po saopštavanju istih, a najkasnije 24 (dvadesetčetiri) sata od saopštavanja istih.

UGOVORNA KAZNA, ZATEZNA KAMATA

Član 5.

U slučaju kašnjenja isporuke/izvršenja, do kojeg je došlo krivicom odabranog ponuđača, isti će platiti ugovornu kaznu u skladu sa Zakonom o obligacionim odnosima u iznosu od 1% vrijednosti ugovora, za svaki dan kašnjenja do urednog ispunjenja, s tim da ukupan iznos ugovorene kazne ne može prijeći 10% od ukupno ugovorene vrijednosti usluge koja je predmet nabavke. Odabrani ponuđač je dužan platiti ugovorenu kaznu u roku od 7 (sedam) dana od dana prijema zahtjeva za plaćanje od ugovornog organa.

Naručilac/Kupac ne može zahtijevati ugovornu kaznu ako je primio ispunjenje obaveze, a nije bez odlaganja pismeno saopštio Izvršiocu/Dobavljaču da zadržava svoje pravo na ugovornu kaznu. Na zakašnjenja plaćanja Izvršilac/Dobavljač će zaračunavati Naručiocu/Kupcu zatezne kamate prema primjenjivom/pozitivnom propisu.

VIŠA SILA

Član 6.

Ako slučaj više sile, potpuno ili djelimično spriječi izvršenje obaveza po ovom ugovoru, ugovorna strana zahvaćena slučajem više sile je obavezna da o nastanku slučaja više sile, o vrsti i o eventualnom trajanju više sile pismeno obavijesti drugu ugovornu stranu u roku od 2 dana od

nastanka slučaja. Ako se blagovremeno ne javi nastupanje slučaja više sile, ugovorna strana koja je pogođena tom okolnošću ne može da se poziva na nju, izuzev ako sama ta okolnost ne spriječava slanje takvog obavještenja.

Pod višom silom, u smislu prethodnog stava, smatraju se spoljni i vanredni događaji koji nisu postojali u vrijeme potpisivanja ovog Ugovora, koji su nastali mimo volje ugovornih strana, čije nastupanje i dejstvo ugovorne strane nisu mogle spriječiti mjerama i sredstvima koja se mogu u konkretnoj situaciji opravdano tražiti i očekivati od strane koja je pogođena višom silom.

Za vrijeme trajanja više sile, obaveze ugovornih strana po ovom Ugovoru miruju, ne primjenjuju se odredbe Ugovora o ugovornoj kazni, s tim da se rok za izvršenje obaveza ugovornih strana produžava za period koji odgovara trajanju slučaja više sile i razumni rok za otklanjanje posljedica više sile.

STUPANJE UGOVORA NA SNAGU I VRIJEME TRAJANJA UGOVORA

Član 7.

Ovaj Ugovor stupa na snagu danom obostranog potpisivanja od strane ovlaštenih lica ugovornih strana i traje 1. (jednu) godinu ili do isteka roka izvršenja tj. do utroška ugovorenih novčanih sredstava. Svi rokovi u vezi sa ovim ugovorom računaju se od dana stupanja ugovora na snagu, ukoliko posebnom odredbom nije ugovoren neki drugi datum kao početak toka roka.

RASKID UGOVORA I POSLJEDICE RASKIDA

Član 8.

Pored slučajeva raskida ugovora u smislu posebnih odredbi ovoga ugovora, svaka strana može raskinuti ugovor i zbog razloga navedenih u ovom članu kada nastupaju određene pravne posljedice. Ukoliko Naručilac bude smatrao da je zbog nepoštivanja ugovornih obaveza od strane Izvršioca ili zbog nastupanja okolnosti koje otežavaju ili sprečavaju da se nastavi izvršenje ugovora, ili to isto bude smatrao Izvršilac u odnosu na obaveze Naručioca, ugovorna strana pogođena tim nepoštivanjem ili okolnostima koje su nastupile, dužna je drugoj strani poslati pismeno obavještenje (preporučena pošta ili telefaks) u kome se navode razlozi koji upućuju na raskid ugovora.

Strana koja je primila prednje obavještenje, dužna je da u razumnom roku, pismenim putem iznese svoje stavove i prijedloge. Ako se iz stavova strane ne može očekivati da se posljedice nepoštivanja, zakašnjenja i druge teškoće u vezi sa izvršenjem ovog ugovora otklone ili ako se sa izvršenjem ugovora ne može nastaviti ni po proteku petnaest (15) dana, onda obje strane imaju pravo da raskinu ugovor.

U slučaju raskida ugovora u smislu prethodnih stavova ovog člana strane će izmiriti sve svoje obaveze nastale do raskida ugovora.

Ukoliko je do raskida ugovora došlo krivicom jedne ugovorne strane, druga strana ima pravo na naknadu štete i izmakle dobiti po opštim pravilima obligacionog prava. Bitna povreda ugovora koja dovodi automatski do raskida ugovora: povreda ugovora koju učini jedna strana smatrat će se bitnom ako se njome uzrokuje takva šteta drugoj strani da je bitno lišava onog što je opravdano očekivala od ugovora.

Izjava o raskidu ugovora ima učinak jedino ako je o njoj pismeno obavještena druga strana.

USTUPANJE UGOVORA

Član 9.

Ugovorne strane su saglasne da se prenos pojedinih prava i obaveza, kao i prenos/ustupanje cijelog predmetnog Ugovora, može izvršiti na treća lica samo uz prethodnu pismenu saglasnost/odobrenje druge ugovorne strane.

Pravni sljedbenik ugovorne strane neposredno preuzima sva prava i obaveze svog prednika iz ovog ugovora, uključujući i obaveze i prava u vezi sa rješavanjem eventualnih sporova i nesporazuma i primjenjivog pozitivnog prava na odnose ugovornih strana u skladu sa odredbama ovog Ugovora.

Ustupanjem ugovora/pojedinih prava i obaveza ugovorni odnos između ustupioca i druge strane prelazi na primaoca i drugu stranu u času kada je druga strana pristala na ustupanje, a ako je druga strana dala svoj pristanak unaprijed, u času kada je obavještena o ustupanju.

Pristanak na ustupanje je pravovaljan samo ako je dat u pismenoj formi. Odredbe o sporednim pravima u vezi sa ugovorom o preuzimanju duga iz Zakona o obligacionim odnosima (koji se primjenjuje na teritoriji Federacije BiH) na odgovarajući način će se primjeniti i na ustupanje ugovora.

Ustupilac odgovara primaocu za pravovaljanost ustupljenog ugovora. Ukoliko Izvršilac ustupa ugovor/pojedinačne obaveze, jamči Naručiocu da će primalac ispuniti obaveze iz ugovora. Druga strana može istaci primaocu sve prigovore iz ustupljenog ugovora, a i one koje ima iz drugih odnosa s njim, ali ne i prigovore koje ima prema ustupiocu.

TAJNOST/POVJERLJIVOST

Član 10.

Svako saopštenje informacija ovog Ugovora neće biti tajne prirode, osim ako informacije nisu posebno označene kao tajne ili zaštićene u vrijeme saopštenja ili ako po svojoj naravi/prirodi nisu očito tajne ili zaštićene. Strana koja prima informaciju može istu, ako se ne smatra tajnom, slobodno upotrijebiti i saopštiti drugima. Međutim, ništa navedeno u ovom članu Ugovora neće se smatrati da daje dozvolu za ikakvo intelektualno pravo vlasništva.

Ako se informacija saopšti usmeno ili pismeno, i strana koja je saopštava želi tretirati tu informaciju kao tajnu, onda strana koja saopštava, označiti će tu informaciju kao tajnu u vrijeme saopštenja i pismeno to potvrditi u roku od trideset dana nakon saopštenja.

Osim kako je dalje navedeno u ovom članu Ugovora, strana koja primi tajnu informaciju saglasna je s time da informaciju primljenu na taj način tretira kao strogo povjerljivu i neće je objaviti, direktno ili indirektno, nijednoj drugoj osobi, firmi, korporaciji, asocijaciji ili cjelini u bilo koju svrhu i neće tu informaciju iskoristiti ili kopirati osim u svrhu ovog Ugovora. Takva tajna informacija može se saopštiti samo onim zaposlenicima, konsultantima i podnabavljačima/podizvođačima strane koja je primila takvu informaciju, koji opravdano/po prirodi posla i odnosa sa Izvršiocom trebaju/moraju imati pristup takvoj informaciji u svrhu za koju je saopštena i koji imaju obavezu čuvanja tajne za stranu koja je primila tu informaciju.

Ova obaveza neće nametnuti nikakvu obavezu nijednoj strani s obzirom na bilo koji dio takve informacije koji:

- je bio poznat strani koja prima informaciju prije nego što je primila od druge strane,
- je poznat ili (bez ikakvog djelovanja ili propusta strane koja prima informaciju) postane opće poznat,
- je primljen od treće strane tako da strana koja prima informaciju u dobroj namjeri vjeruje da je slobodno može saopštiti i bez ograničenja u saopštenju,

- strana koja saopštava informaciju, istu saopštava trećim licima općenito, bez ograničenja u saopštenju.

Obaveza tajnosti izložena u ovom članu Ugovora će opstati na snazi i nakon okončanja/isteka Ugovora za neograničeno vrijeme.

PRIMJENA ZAKONA O OBLIGACIONIM ODNOSIMA

Član 11.

Ugovorne strane su saglasne s primjenom odredbi Zakona o obligacionim odnosima i to u pogledu prava, obaveza i odnosa koji nisu regulisani odredbama ovog Ugovora, a koji nastanu u vezi i povodom izvršenja ovog Ugovora.

RJEŠAVANJE SPOROVA

Član 12.

Sve eventualne sporove i nesporazume koji bi mogli nastati iz ovog Ugovora ili povodom ovog Ugovora, ugovorne strane će nastojati riješiti usaglašavanjem, posredovanjem ili na drugi miran način u duhu uzajamnog povjerenja i dobrih poslovnih običaja.

Ukoliko ugovorne strane ne postignu mirno rješenje eventualnog spora u smislu stava 1. ovog člana, ugovara se nadležnost Suda u Sarajevu, Bosna i Hercegovina uz primjenu pozitivnog prava Bosne i Hercegovine.

OSTALE ODREDBE

Član 13.

Isporučilac nema pravo zapošljavati, u svrhu izvršenja ovog ugovora, fizička ili pravna lica koja su učestvovala u pripremi tenderske dokumentacije ili su bila u svojstvu člana ili stručnog lica koje je angažirala Komisija za nabavke, najmanje šest mjeseci po zaključenju ugovora, odnosno od početka realizacije ugovora.

Član 14.

Izmjene i dopune ovog Ugovora mogu se vršiti samo pismenim putem. Biće punovažne i obavezujuće ugovorne strane samo one izmjene i dopune koje su sačinili sporazumno u pismenoj formi.

Član 15.

Ovaj Ugovor je sačinjen u 4 (četiri) istovjetna primjerka, od kojih svaka ugovorna strana zadržava po 2 (dva) primjerka.

Za Izvršioca:

Prof. dr. Faruk Selmanović

Broj: 1108-19-105/2

Datum: 25-01-2021

Za Naručioca:

Prof. dr

Broj: 01.03-108/21

Datum: 13.01.2021

